

MMOSA VARIYARI

V'EMILYAWU EMOSA



Kooxukhuru, munna. Kooxukhuru, Munna Shakarian.

Nto mooxeleliwa, apatthani. Veekahi ti yooreera okhalatho oLos Angeles nno voosiis'ula, ohinatthi muthukuman'ola muulupale, ni muthukumano ontharelana wa esuman'ela enrwa w'Oteeli Embassy. Kinniwehererya owoonani nyuwo othene weiwo. Ni hiyo niri ni nwehereryo muulupale w'okumana ni Pwiya'ahu Yesu, wira nimooone Yoowo weiwo. Owo oolaiherya wira aamukhala-wo, "vanthukuman'aya aili wala araru vamosa," Owo onookhala vaavo.

² Ni kookupali wira kookumana ni Yoowo voosiis'ula okathi waawel'aka ixikatta va mw'autitooriyu ula, okathi atthu othene ni nwehereryo muulupale, alipelelaka olya wa voosiisu ni olaleerya. Ni ti yooreera othukumana va ni nyuwo, ni alipa-oowiiwa muraatiyuni. Aakhala anci-ene mu, awo a . . . Kaahaana okhuruwela epantte ekina ya vathi, n'ulavula n'atthu kamosa-kamosa. Ni kihoona soovekela sinci-ene, eretta ya murima, ni iretta soohiyana-hiyana sa irutthu saya, ni hiyo niri va vano wira naavekelele aretta n'ale ooxanka.

³ Okathi ophiyal'aka vasulu va ixikatta . . . Kinimuweha mulopwana mmosa mutokweene vano. Owo aarookirweela, khwira, "Munna Branham, iyaakha sivinre . . ." Owo khwira wira aarina eretta ya murima vootepexa mpakha owo . . . yuupuweliwaaya wira aarowa okhwa. Vano hiyo khunvekelela, nto mahala a Muluku khunvonihana. Nto ola ori va voosiis'ula, ni iyaakha soophiyaka miloko mithanu na miraru, atthapaka. Vano eyo enniniiriha okhalana nrromelo musya.

⁴ Nto vano veekhai kinvekela mavekelo a atthu ale aniiwa muraatiyuni, siiso-tho va. Kakhuma vale muthukuman'ola, kinrowa Europa, wAfrika ni mapuro makina, mmithukumanoni. Ni ela entthariha yoowoona, tivo onrowa okhala muthukumano muulupale iwe, kookupali. Ni mwa iyaakha sinci-ene kaahoona wira Apwiya yaatthuna wira kitthike. Muteko voowiiyeviha-vo mukhaani, woowiiyeviha Awo akivahaly'aya, nkinoona wira Awo aamala okivarela muteko voomalela, weiwo. Yaakhala ntoko ookhala mutthu nipuro nlo kaakhanly'aka omuvaraka ni ntthavi na Ehapari yooreera, nenlo Awo akivahaly'aya wira kaatothaneke atthu, ni ovoniha wa Muluku, waavekelele aretta. Ni veekhai kinniveka mavekelo anyu, hata a nyuwo muri va ni awaya ale aniiwa muraatiyuni.

⁵ Nkirina okathi w'okuxa yoosoma n'ulaleya, yeeyo kinweherery'aka wira naanaano va mu—mu...mw'autitooriyu ula, masi olavula paahi ni—ni nyuwo okathi vakhani, wira nisuwelane. Nto w'atthu mmuttettheni, kinrowa waavekelela ale ota iwe, naanaanoru, ni nyuwo va nave. Ni vekeekhai kootteeliwa murima waasuwela apatthani ala othene ooreera murima a naanaano kihinatoko aka waasuwela khalayi, kimanly'aka okumana—no voosiisu yoola.

⁶ Hiyo ninnikhalanaka mireerelo suulupale sa miteko mapuro makina. Miyo nkinikhuma—tho vanci—ene, ti yoviriwaxa. Hiyo ninehererya okhalihia erampha yooviha eeryari ya Jeffersonville, Indiana ni Tucson, Arizona, weiwo othamenly'ahu—wo iyaakha vakhani sivinre, ni yoowoona y'Apwiya, anirumaly'aya weiwe, nave, kihisuwelaka otthu waarowaaka. Nto anci—ene a nyuwo nno, oClifton's, miyo koolavula ni nyuwo okathi vakhani kihinatthi orowa, ni muthukumano w'oPhoenix, yoowoona yaaruule. Kaahoonu Malaikha mathunu na manli munikhuruni.

⁷ Ni miyo koosuwela, w'ale aniiwa muraatiyuni, khino anci—ene a nyuwo khamuhiyo a Ehapari yooreera yoomalela, ni ela pooti okhala ntoko ya mwiiriirya vakhani wa nyuwo. Yeeyo, yaarowa okhala wa miyo, masi yookhala...Mutthu ti mutthu onwerya otaphulela sothene, khamurina okupali—tho ni waamini. Ti itthu nihinwery'ahu otaphulela, nirin'ahu okupali mwaha wo waamini. Khanikhanle omutaphulela Muluku. Khaavo mutthu onwerya omutaphulela Muluku. Owo ti muulupalexa, ni Owo muulupale ni oowerya. Hiyo paahi—hiyo ninookupali paahi okhala wira noosuwela wira Owo ori vaavo. Vano nto mwaha wo waamini wahu, w'okupali yeeyo, Owo onniruhela eyaakhulelo, opatiiso wa Eroho Yowarya.

⁸ Yeeyo, enrowaaka wooleelani, okathi vakhani va, mwaha wa, ephiro “ya Muluku”, ahiiso, “nipuro n'okokhorela—vo.” Nto nipuro nimosa paahi mukhanly'anyu omukokhorelaka Yoowo, nipuro nimosa paahi Owo onrowaawe ophiyererya okumana ni nyuwo, yookhala...Eri Ekereja emosa, nipuro nimosa, emaara emosa, nloko nimosa, wa othene ale Muluku onkumanan'awe. Ni kinwehererya wira Apwiya anooreeriha Mutthaka mmurimani mwanyu nyuwo va.

⁹ Vano, kiphiyaka oTucson, yaari yootikiniha, soowoona iye silavulaka ni nyuwo ni Nsina n'Apwiya. Hata emosa wa seiyo kinwery'aka wuupuwela, mmukohe mutthu ti mutthu onwerya wuupuwela khula okathi, Awo atonko aya ohimya etthu p'itthu yahaakhanle Ekeekhai. Kweekwe eniiraneya volikana siiso Awo anihimy'aya wira enimwiiraneya.

¹⁰ Ni Awo ahaana, vootthariha Soolempwa, otthikela wa hiyo mahiku ala ookiserya, mwa enamuna yeela ya muteko. Eyo enrowa okhala nuumala opatiiso wa Eroho, ni olavula ilavulelo,

ni ovoniha wa Muluku, ni sikina, itthu seiya. Ni omaliheriwa wa mutthaka wa Pentekosite ti yoowo onlavul'ahu olelo. Mutek'ola wa Kristu Mwaneene wo wooniheriwa eriyari y'atthu Awe, ni itthu sene seiyo Owo iiraly'awe okathi waary'awe elapo ya vathi vaava; mw'Erutthuni mw'Awe, Mwaakameliwa, okhanle epante ya Yoowo, airaka itthu imosaru, ntoko Iya ni Mwaara, wala Mwene ni Pwiyamwene, okathi vakhani nihinatthi niira n'Othelana.

¹¹ Esuman'ela, Apwiya yatthuna vale, kaanitthuna kilavule yeeyo, okampaanyani wahu nno, w'o—w'Oteeli Embassy, ni wira mulimalele enamun'aka voowiiyeviha yo wira yeeyo. O—okathi ni ewoora enkhal'ahu, mutthu aahisuweleke epante xeeni y'orowa, etthu yo wira wala moota w'orukunuwa, nyuwo mu—nyuwo khamuneetta-tho ni waamini; nyuwo munimwaakanyerya paahi, munimwaanyiherya. Ni *waanjiherya* onkhala—onkhala “orowa ohoolo muhirummwe ni muhooleli.” Tivo hiyo naahikhalane orummwa ni muhooleli wira nisuwele ele Muluku aahimaly'awe wira yaamwiiraneya okathi ula, ninrowa ophiyererya sayi woonana okathi ula? Ni hiyo nihaana woonana, nisuwelaka, mwaha wo waamini Masu Awe, itthu sintthuneya wira sikhumelelaka vano, ni mukhalelo wa ilapo, mukhalelo w'atthu, mukhalelo wa ekereja, ni sikina.

¹² Nihaana osuwela yeeyo, vano nto moota w'okhuma wira noonanane. Mwaahisuweleke moota wo wira yeeyo, nyuwo paahi—paahi ntoko saahimyak'ahu, ntoko, voohiwehererya; muniira paahi, muroromelaka wira enookhala vaava, muroromelaka *ela* ni muroromelaka *ele*, ni “enookhala yeeyo?” Masi Muluku khontthuna wira niireke yeeyo. Owo ontthuna wira nisuwele ele Owo ohimaly'awe mwaha wa mahiku ala, vano nto okumana ni yeeyo ni waamini, okhala wira Owo ohimnye wira yaarowa okhala siiso. Vano hiyo—hiyo ninoosuwela wira muri mw'Ekeekhai nto, okhala wira khamukunxe nuulumo na mutthu wa yeeyo; mukunxe Masu Awe wa etthu nirin'ahu wira. Ni hiyo ninwehererya wira Atith'ihu a Wirimu ano—anoonivaha yeela esuman'ela.

¹³ Vano, kileveleliwe mwaha w'othikilela, etthu kaahimy'aka okathi vakhani ovinre, wa orowa oTucson. Nto yoomi, kuupuwela wira, yaari emalelo y'ekumi aka. Koona wira khaavo aarowa owerya ovilela ekusakeryo ya enamuna yeele yaakhumelenle mwa yoowoona ele voosiis'ule, ewoora yoophiyaka yanamuloko owaani, wira aamuwerya okhala mukumi nuumala yeeyo. Vano, miyo khurwa oTucson, kipakaka itthokiheryo ni mwan'aka, wira amwaar'aka n'a—n'anamwane erowe ni yoowo miyo kironweene, okhala wira koona wira yaari emalelo aka. Nto miyo, oPhoenix ni mithukumano sinciene ehinatthi wiiraneya, kaahooleelani voolikane-ene moota yaarow'aya wiiraneya.

14 Ahe, okathi vakhani nuuvira yeeyo, kaari osulu iwe Ekhatu y'oSabino voosisu umosa, weiwo okhanle ovikanakaru onkela epheyo w'oTucson. Kaari weiwo wira kivekele. Nto okathi waavekel'aka, kaahivenxerya matata osulu, kiiraka, "Tithi, kinnoovekelani wira Nyuwo mwa enamuna emosa mukikhaliherye, mukivahe ikuru, mwaha w'okathi onivir'akamo. Ni muteko aka wamala vale elapo ela ya vathi, nto kihaana orwa wa Nyuwo. Ni kahi wira kinimwiikhupanyerya orwa, masi koozuwela wira Nyuwo munookhapelela ethhoko aka. Ni miyo—miyo kinvekela ikuru paahi wa okathi ula." Vano etthu emosa khurwa mmatatani mwaka!

15 Vano, alipa aniiwa muraatyiuni, ela pooti wooneya okhala yootikiniha eyo ehimaly'aka, masi eyo ekeekhaii. Ni Muluku ti Mphuki aka.

16 Miyo khuweha ntata naka, nto aahikhala xoowa, aahikhalana nluwo epantte ya nvini. Nto nvini ene waapakiwe ni nluku noowaarya, ni waakhala ntoko vanivara ntata na eweero onvinini. Nto o—orere ene waakhalaxa ntoko etthu yoowaarya, oh, etthu ntoko ekromo wala etthu enaarya vansuwani.

17 Vano, yaari ewoora yanamuloko wala muloko n'emosa voosisu, vasulu saana vamwaako. Nyuwo munoowerya otthokelela moota mutthu (miyo kinoon'aka wira kiri ni muupuwelo aka wooloka) aarowaawe woona ophwanyaneya vale ni xoowa aakhuma kaahiki woowi, khayaakhanle atthu ikilomo ikilomo sene, ovarenleene yeeyo mmatatani. Miyo kaahoono okikwannya waya, kikuxa kivaravara orere aya nno ni nno, nto, vano, aari xoowa.

18 Nto miyo khuwehaweha. Miyo khwira, "Ahe, vano, eyo yaaweryaneieye sayi okhumelela? Va keemenle va, vaava, va, ni hata mutthu vakhiviru ikilomo ni ikilomo sene, nto eyo yaakhumme woowi?" Nto miyo khwira, "Ahe, miyo—miyo kinoona wira khino t'a—t'Apwiya anikileela wira ela emalelo y'okathi aka."

Nto Nsu nimosa khulavula khwira, "Ola Xoowa a Apwiya."

19 Nto miyo khuupuwela, "Ahe, xoowa mmosa, nto eri... ntoko a mwene, wira atthokihe ekhavalu," moosuwela, ntoko siiriwak'aya oInklateera ni mapuro oohiyana-hiyana. Miyo khuupuwela, "Ti ya yeeyo ekhanly'aya, otthokiha ikhavalu." Nto khuupuwela, "Ahe, khino kihaana owiixaatherya matata atthu, wala..." Miyo kaahikhalana mithinto sothene... Muupuwelo wa mutthu pooti okhala wothene wootikinihiwa, moosuwela. Khivansuweleya. Miyuupuwelo sahu sinnimala; Wawawe ti woohimala. Vano, nto kiry'ene, eyo... Vano eyo khukhuma mmatatani mwaka ni miyo nkaasuwela nipuro yaarowaly'aya, yaaroolakaseya paahi. Vano, mutthu ahaasuwela vakhani mwaha wa itthu s'erooho, nyuwo—nyuwo mwaamuvahuwa siiso. Nyuwo mwaamweemela vale, mwiikohaka etthu ekhumelenle.

20 Nto Awo khwira, “Yoowoona kehiyo emalelo y’okathi anyu. Ti ya muteko anyu. Xoow’ole ti Masu. Ikanyeryo Thanu na piili sinoorowa otaphuliwa, isiiri sa . . .”

21 Vano nto isumana piili nuumala yeeyo, ahiiso miyeeri miili, kiireke, nuumala yeeyo, miyo kaari vasulu va mwaako ni nikhuru n’axipatthani okathi yaakhumelenly’aya. Malaikha Mathanu na manli, vowooneyexa ntoko nyuwo muniphwanyaney’anyu va, yaakhurunwe voowaakuva ekhumaka Wirimu. Myala mmiyaakoni khuphirikeyela mukerekhere, nto—nto atthu yaaphwanyaneya vaavale enyakulaka ni yiiraka siiso, moosuwela, ni nthupi nivenyaka mapuro othene. Nto vairaneiy’aya, Awo khwira, “Mutthikele owannyinyu. Enrowa okhala vano, khula Nlaikha ninrowa okhala emosa wa ikanyeryo sa Ikanyeryo Thanu na piili.”

22 Yeeyo, eri mufiitani. Nto eliivuru ene enookumiheriwa naanaanoxa, okhala wira vano p’uhimya wene anreheriwa malavulelo. Ntoko munsuwel’anyu, elavulelo aka kehiyo yooreera saana, nto atthu khayaarowa . . . Nyuwo muhaana paahi okhala atthu anikiphenta ni munsuwela moota wookiwa mwa elavulelo aka. Masi muteyooloku mmosa onookilakiheryela elavulelo, n’ukumiha sothene e—e . . . Ahe, khino miyo kihimiyale nuulumo voovonyeya memmo. Hata yoomi nkinsuwela. Vano, koomwiiwa mutthu atheyaka, tivo kinoona wira “olakiherya enamuna y’olavula” khiyaalikanne. Masi ntoko mulopwana a Holanta, mukikuxe n’ile entthun’aka ohimya kahi ele enihimiy’aka, khino.

23 Ni sinihala minuutu miraru paahi vano, kooleeliwa, wira emale epokrama.

24 Vano, nyuwo atthu oophentiwa muniwa muraatyiuni, ni nyuwo munwereiwa ni muri oothoiwa vamuthukumanoni va, mwiixaatheryane matata paahi mmosa ni mukhw’awe vano nirineene nuulumo nla na mavekelo w’aretta. Vano, Yesu oohimya, oruma Wawe Ekereja wookiserya, “Ithoonyeryo iya sinimwaatthara ale anrowa waamini.” “Ale,” ale anrowa waamini! “Awo yawiixaatherya matata aretta, awo anoopenuwa.”

25 Tithi Oophenteya a Wirimu, hiyo niri ntoko anamwane olelo, hiyo nintthara ele Nyuwo muhimaly’anyu wira niire. Niniixaatherya matata soovekela iya sothene sa mutelefoonini. Nyuwo munnoona iwo mulaponi, moota awo ary’aya oothoiwa, ohaawa. Nyuwo munniwoona ala va ari oothoiwa, ehaawaka. Nto hiyo ninaavahererya yaawo wa Nyuwo, Muluku oophenteya, ni waamini nno Masu Anyu Nyuwo muhimaly’anyu wira, “Ithoonyeryo iya sinimwaatthara ale anrowa waamini. Awo yawiixaatherya matata aretta, awo anoopenuwa.” Munivahe, Pwiya, mwa Nsina na Yesu Kristu. Amen. [Nipuro vahiitthu mufiitani—Mol.]

[Munna Branham onimaliha eprokrama yoopacerya ya muraatiyuni—Mol.]

☆☆☆☆☆☆

²⁶ Kooxukhuru, Munna Shakarian. Vekeekhai oreeriwa wuulupale otthikela eprokrama ya muraatiyuni, wira nilavule n'axipatthan'ihu kamosa-kamosa animwiiwa raatiyu, n'ale ari vaava.

²⁷ Ni vekeekhai hiyo nininlaanyiha olattula nno wa nyuwo, wira murwe w'Oteeli Embassy meelo oxekuwa, wira nvekeleliwe. Ni kahi yeeyo paahi, masi mwaaruuhe ale akhanle anatampi n'ale atthikenle ottuli. Naavekelelaru aretta paahi, ni ninnimoona khweeli Muluku opaka miiriirya suulupale voohihererya, masi eyo ti yanenli. Ethhu yuulupalexa woopowaa, osarihiwa Eroho ya Muluku, yeeyo enrowaaka woohimeeryani okathi vakhani va, ni ephiyeryelo moota nirin'ahu okhala oosareya Eroho ya Muluku.

²⁸ Nto ovoniha wa Muluku voolimaleleya onaakuxa murima athu, ni waaruua Ohoolo wa Muluku. Muluku aairaka ethhu awo—awo ansuwel'aya wira ti yo-. . . ahe, ti yoohisuweliwa saana. Hiyo khaninwerya wooniherya mwa enamuna ya erutthu moota eniiriw'aya. Muluku oniira mwa enamuna Awe Yoowo yuulupale. Vano eyo ennaakuxa murima athu, osuwela wira woorkhala Mukhalelo wa Owerya nipuro nlo, onwerya wira ethhu yoovikana musuwelelo wa mutthu, ni eyo enniwiiriha omuweha Mwaapwittipwitthi a Muluku. Ni kweekwe, ovoniha wa Muluku, kooleeliwa, ni miyo kinaamini, yoomi, wira ipursento soophiyaka, miloko mithanu na mosa, khino, ni miloko mithanu na miili, wa muteko wa Pwiya'ahu, waari wa ovoniha wa Muluku. Ni Owo iirale yeeyo wira aakuxe murima athu. Vano okathi awo yaary'aya vale, Owo khwira, "Mwaahaaminiru wira Miyo ka Yoowo, munoopweteya mutampini mwanyu."

²⁹ Vano, ovoniha wa Muluku eyiitthanelo yuulupale, wira waaphiiherye athu omuweha Pwiya Yesu. Ni Totori F. F. Bosworth, yoowo anci-ene a nyuwo mukhanle, mwaari apatthani awe, ni mwaanimusuwela, nto muteko awe khuwaareere okhala maana wa miyo ntoko murumeyi mmiravo. Miyo kaaropacerya mithukumano saka, vano khumusuwela Munna Bosworth. Owo aahimyaka wira, "Ovoniha wa Muluku," nla nuulumo noolipa vano, owo aahimyaka wira, "Ovoniha wa Muluku ecampo vacooloni." Iiraka, "Khenoonihiwa ehopa coolo ene. Enoonihiwa ecampo, vano nto eyo enrowela ecampo khumuluma coolo." Tivo eyo t'ile hiyo eneeherery'ahu wira. Eyo ti yawihu. . . hiyo. . . Otthuna wahu waaroiha athu wa Pwiya Yesu Kristu. Ni Owo mmosaru nsana, olelo, ni mahiku othene. Tivo vakhala wira Owo aari Mpenuxa mahiku avinre, Owo Mpenuxa olelo.

³⁰ Onamoona wa mmansaka paahi kihinatthi waavekelela aretta ale aniiwa muraatiyuni. Yaari mahiku vakhani

avinre, miyo kaakilanthe vamwaako weiwo etthu yuulupale yaakhumelenly'aya ohoolo w'axinna muloko n'athanu wala miloko miili vale, vaavo Nlaikha n'Apwiya nakhurunw'aya mpakha, ni Waarya wuulupale waavava ntoko ekomeeta, erumaka vale mmiyaakoni, ni myala sirihwaka imeeturu miloko mithanu na mosa n'emosa, wala ovikana, vaavale, ethikilaka vasulu va miri. Nto miyo keemenle vathi va Yeeyo. Vano miyo khwaaleela miyeeri vakhani eyo ehinatthi wiiraneya, wira Eyo yaarowa okhala weiwe ni etthu yaarowa okhumelela; vekeekhai, eyo yaahimmwe nsana naya. Nto axilopwan'ala othene etthyawelaka vathi va ikamiyawu ni sothene, ephavelaka otthayawa. Awo khayaasuwela etthu yaakhumelenle. Nto Owo khulavula khuhimya etthu yaarowa okhumelela naanaanoru ohoolo waya.

³¹ Kikilanthe-ene vamwala mmosa vale, vaavo vene Owo aakhumelenly'awe, miyo kaahikhalana m—mpathani aari ni hiyo, aaruule okhuma oMinnesota. Atthu awe ari vaava voosiis'ula ni nkikupanli sinto owo ori vaava nimosa wa mapuro makina. Aari Donavon Weerts, ni mmiravo mmosa ooreera murima, muLuteraano aammalaru ovahererya makhalelo awe wa Kristu khusarihiwa ni Eroho. Mmiravo mmosa a wAlemaanya oowiiyevihasaana, a iyaakha soophiyaka miloko miraru, emusi, aana aili wala araru axikhaani. Owo aathamenle oTucson wira akhale namwaattamanani aka paahi, weiwo atthu imiya tthaaru wala xexe yaathamenly'aya-wo wira yaattamane. Tivo owo . . .

³² Ni kinnitteeliwa murima okhalana anamwaattamanani ntoko awo. Awo annikitthara mpakha wAfrika du Sul, ni mapuro othene iwo, wira ekhale vakhiviru paahi yoone e . . . ni miyo, ni okhala ni miyo ni opuha soopuha s'Apwiya.

Mmiravo mmosa oowiiyeviha, miyo nkinatoko omuwehexexa.

³³ Vekeekhai, atthu kinaasuwel'aka ni anikiveleela ankhala ntoko munn'aka, murokor'aka. Miyo kinimwaaweha, ni woona sinto kinoona wira anookhuma mphironi, nto kinoowiihana epante emosa n'ulavula n'awo, okhala wira kinnaaphenta. Ninthuna nakhale Moovuwani hoothe. Ni imaara sikina khino, mmithukumanoni, nyuwo munoona wira kinlavula volipava-vo ni nyuwo. Kahi siiso. Kahi mwaha wo wira nkinoophentani, masi enkhuma vamurimani, okhala wira miyo—miyo . . . Ehaana okhala enamuna emosa paahi. Eri enamuna emosa paahi y'omurumeela Muluku, ni ekhanle . . . Ni hiyo nihaana okhala mphironi mw'Awe, hata wira miyuupuwelo sahu ti sivi. Ephiro Awe!

³⁴ Nto miyo kaahiweha wira Donavon, okerekhere woothiyana wa niyaru nawe, naarimwiipa khino imaara tthaaru wunnuwa waya, ni naakhala ntoko nooxeerya saana. Ahe, vano koonaka

wira khino, mwaha w'okhala mothakoni mahiku vakhani, wira otthu waary'ahu-wo, wira khino owo aaroowapha niyaru nawe n'ekosa. Masi, kivarelaka ntata nawe, khusuwela wira aari kankuru. Vano miyo khumuhimeerya Donavon, miyo khwira, "Donavon, mookhalana...Eyo eri vaniyaruni vanyu okhuma okathi xeeni?" Ntoko wira kimuhuluxe paahi, ntoko wira nkaasuwela. Miyo khwira, "Eyo eri vo okhuma okathi xeeni, Donavon?"

Owo khwira, "Munna Branham, miyeeri soophiyaka mithanu na mosa," owo khuhimya.

Miyo khwira, "Mwahaakihimeerelani yeeyo miyo?"

³⁵ Owo khwira, "Oh, kiwoonakani okhalanexa muteko," khwira, "Nkaatthuna wi—wira yeeyo." Khwira, "Miyo koono wira paahi khino Apwiya yaamoohimeeryani."

Vano miyo khwira, "Munnuupuwelela wira exeeni iyo?"

Owo khwira, "Kinnuupuwelela."

Miyo khwira, "Ti yeeyo."

³⁶ Nto voosiisu wananli, yoohivikana yeeyo, kivarelaka ntata na mmiravo, voosiisu vanenli, khinaakhanle hata nlepa vanaaruni vawe. Yaahimalamala yothene.

³⁷ Imaara sinci-ene hiyo ninihelela ikuru, niphavelaka ophwanya *ela, ele*. Wala...Moone, ti, "Ithoonyeryo iya sinoomutthara mulipa-oowaamini." Khehimmye wira "awo yaavekelela-ru aretta." "Yawiixaatherya matata aretta, awo anoopenuwa!" Nihaana waamini, yoohi, ele eniir'ahu. Vaareera.

³⁸ Nto vano Donavon alakela ori vaava. Munoomusuwela. Owo onookhala vaava, aahikhale vale vaava voosiis'ula, nimosa wa mapuro makina. Munoomusuwela, n'uwo onoosuwela onamoona ene.

³⁹ Exeeni-tho kaakhanly'aka ohimiyaka? Kookupali wira Luka, wala Yohani, mmosa, ohimmye wira olumwenku khawaarowa owerya ohi-...omalela-mo, ophiyerya iliivuru saarowa olempwa sa itthu Owo siiraly'awe eriyari y'atthu mahiku ala ookiserya; moota aretta avonihwaaya, anamuhapaliwa yoopoliwaaya, ikonto sene a yaawo, ni inamuna sothene sa iretta ni mixankiho.

⁴⁰ Vano, nyuwo muniwa muraatiyuni, siiso-tho va, miyo kivarenle soovekela sinci-ene siruule mutelefoonini voosiis'ula, oruma voohihererya okhuma okathi niphialy'ahu va. Vano nto hiyo...Soovekela emiya emosa ni miloko mithanu na mixexe ni thanu na mosa siphiale voosiis'ula, mutelefoonini, okhuma okathi niphialy'ahu va. Vano nrowe nitakanxane mmavekeloni vano okathi khula mmosa...Khula nipuro mury'anyu, mmuttettheni, mwiixatheryane matata mmosa ni mukhw'awe, mwakhala alipa-oowaamini. Vaahikhale

siiso, mwiixaatherye ntata vasulu va Bibilia wala etthu iwo, nivekelaka nno ni iwo.

⁴¹ Tithi Oophenteya a Wirimu, onamoona mwaamukhaani wa Donavon Weerts, mmosa paahi wa ikonto sene, Pwiya, wira Nyuwo murin'anyu vooreera-vo murima... Kinvekela wira Nyuwo nwehe vathi mmurimani mw'atthu va ni animwiiwa raatiyu. Ni wira awo, khula mmosa, avonihiwe. Mutakhali aahiye, ni wira avuluxiwe muxankiho aya wothene. Munivahe, Tithi. Mwa Nsina na Yesu Kristu Mwan'inyu, hiyo ninnivekela. Amen.

Kooxukhuru, Pwiya... [Nipuro vahiitthu mufiitani—Mol.]

[Munna Branham onimaliha epokrama ya nenli ya raatiyu—Mol.]

☆☆☆☆☆☆

⁴² Ahe, ela imaara tthaaru wa miyo va voosiis'ula. Wulu! Nto, moosuwela, vanoomalaru ohimmwa wira nihaana ohiya empa muhina mwa minuutu muloko ni miili, muloko ni mixexe, wala etthu. Ni alipa-ooweettiherya aahimya, yaawo ari nipuro nikina vale, ni awo khakhanle ovahaka yolya. Solya sahu saahilekela. Hiyo nookhalana mihasa sinci-ene, moosuwela. Tivo hiyo khanireere, khanireere oxukhuru mwaha w'okhalana yopeeli ula, muulupale, a yolya ni a eroho ntoko kaarowaaka omwiihana, voosiis'ula va ni nikhuru nla nooreera n'alopwana.

⁴³ Miyo kaatthuna ki—kihimye wira niri... muteko w'okokhorela—tho, meelo oxekuwa, oEmbassy. Vano, ninrowa okhala naavekelelaka aretta weiwe, ni niwehereryaka Muluku okumana ni hiyo. Ni miyo kiruule okhalela ni epante aka, muteko aka, wira kiire (sothene sinwery'ahu) muthukuman'ola wira okhale mureerelo. Kahi mureerelo mwaha w'okhala mithukumano sahu, masi mureerelo w'atthu omuphwanya Yesu Kristu. Owo ti mureerelo. Khula muthukumano, hata nimmuttottopela sayi Muluku, itthu kavi suulupale ninimoon'ahu Owo avaraka, imaara kavi Owo onlavul'awe ni hiyo mw'Eroho, ni sikina; vooikhala wira enookhala etthu yiireiye, atthu kamosa-kamosa okelihiwa Moomweneni!

⁴⁴ Ni Munna Shakarian onoomalaru ohimya nu—nuulumo nimosa n'ekeekhai vano wa etthu owo uupuwenly'awe mwaha wa mahiku ala hiyo—hiyo ninkhal'ahu. Vekeekhai kinnaamini ni murima wothene, wira hiyo ninkhala okathi w'ekiseryo, vekeekhai mmi—mmiyuuttutthini sa makaaripi. Nsuwa khanireere ohoola. Nto okathi onoon'ahu itthu siiraneyaka moota siry'aya olelo, vano, ti yoolipa ohimya etthu nloko nikina naarowaaya oruuha. Mahiku vakhani avinre... .

⁴⁵ Mukihiye kiwooniheryeni etthu yaamukhaani y'omeekha. Yootokosiwa w'Arizona wothene, weiwo onkhal'aka, wa ixikola sothene. Yiiriwe n'anamwane, awo ehisuwelasaka,

omwaleiwa muupuwelo. Nto moosuwela exeeni? Hata ixikola sekuntaariya ni—ni ixikola soopacerya, yaahikhala anamwane ipursento miloko mithanu na miraru jaarina muupuwelo woohiloka. Ipursento miloko mithanu na miili a yaawo yaari ale anoona televisawu. Moone, sootakhala, iyo sironophiyerya hiyo voohisuwela ni khani...Enookohiwa mwaha wa xeeni eyo wiiraneyaka. Vanniiwiwa Nsu na Muluku nikhuwelelaka voovirikanya yeeyo, nnakhala vo nno hiyo—hiyo nimphwanyaneya nivitikeleliweene memmo.

⁴⁶ Mukihiye kooleleni etthu yooxankiha. Moone, “Kahiyo othene ole onikiirela Miyo, ‘Apwiya, Apwiya,’ onrowa okela; masi ole oniira sintthun’aya Atithi Aka.” Otthuna Wawe Masu Awe. Hiyo pooti okhalaxa natiini, oviriha okathi muulupale, nikhuwelaka, nituphaka, mmithukumanoni mu, hiyo siry’ahu...Miyo nki—miyo nkinthuna okhala namuulumela. Masi kihaana ni—nitumererelo kirin’aka omwiirela Muluku, nto nitumererelo nlo okhala naxariya ni ohimya ele Owo ontthun’awe wira kihimye. Ni miyo—miyo vekeekhai koooteeliwa murima mwaha wa nipuro nuulupale na oCalifornia onikhalaka oovilela ni miyo mwa—mwa ikupalelo saka. Kaahilavuleke ikupalelo saka, ka namirima miili nto vano hata nkihiyo a exariya ni nyuwo. Ni kaahiwerye okhala a exariya ni nyuwo, kinrowa okhala sayi a exariya ni Muluku? ‘okhala wira kinniwoonani ni kinnilavula ni nyuwo. Vekeekhai, hiyo ninnilavula, ni Muluku, nave, masi nihaana okhala naxariya vekeekhai ni a nneema mmosa ni mukhw’awe. Hiyo vekeekhai niri o—wwoopiha, okathi wwoopiha. Nto nyuwo mootoko weemela. . .

⁴⁷ Mukihiye kooleleni etokoseryo yaamukhaani. “Kahiyo othene ole onikiirela Miyo, ‘Apwiya, Apwiya,’ onookela; masi ole oniira sintthun’aya Atithi Aka.” Yesu oohimya, elapo ya vathi, “Mutthu khankhala mukumi ni yolya paahi, masi ni Masu othene.” Masu othene! Kahi imaara kamosa-kamosa, Nuulumo nimosa, masi Masu othene.

⁴⁸ Waari mwaha wo ohaamini Nuulumo nimosa, ni Muluku. . . na sooruma sa Muluku, waakolomolinhe okhwa, oxanka, ni iretta sothene ni owereya murima, mwaha wo okumiha Masu a Muluku, Nuulumo nimosa! Vakhala wira owo ookeliha nloko n’atthu mookhwaani, mwaha w’okumiha, ohaamini Nuulumo nimosa, “vekeekhai,” vekeekhai. Masi Owo aahimmye wira yaamwiiraneya. Satana khwira, “Vekeekhai kheniiraneya.” Masi yaahiraneya.

⁴⁹ Tivo, nihaana osuka Masu othene a Muluku. Nto vakhala wira atthu ni ohaawa nno wothene ni itthu sikhumelenle nloko n’atthu, mwaha w’otaphulela voohiloka, ahiiso—ahiiso ohaamini Nuulumo nimosa, ninrowa otthikela sayi nihiyaka Nimosa, vakhala wira yaahitthuneya esisapo ela yothene, hata Ekumi ya Mwan’Awe?

...oowiihaniwa ari anci-ene, ... oothanliwa ari vakhani.

...oowiihaniwa ari anci-ene, ... oothanliwa ari vakhani.

⁵⁰ Nkikhanle okumihaka mwaha mwa yeela, masi, 'okhala wira khanirina okathi, masi wira koohiyereni etthu.

⁵¹ Nuupuwele e... Miyo kaahirowa nihiku nimosa ni Munna Shakarian, weiwo waatakanxiwa mixovo sa imompe. Nto kaahoonna e—e... olaporatooriyu weiwo Munna Shakarian aakiroihaly'awe-wo. Vano khuheliwa mw'ekhasani ya emompe yoolopwana, yaamukhaani paahi... ntoko ekaruma yaamukhaani, erikittili ya murantho, nto yaakuxiwa ekhasa eyo vakhani, khuheliwa mmikroskoopiyu waannuwiha imaara imiya sene. Nto saahikhala iropo sikhaani saatupha memmo, mw'ekhasani memmo. Yeeyo, hiyo ensuwel'ahu wira ekhasa enkuma wa oolopwana, nto nooce wa oothiyana. Vano miyo kaahimukoha mulipa a kiimika weiwe, miyo khwira, "Xeeni ile entupha vakhani siisaale?"

Owo khwira, "Iye—iye inyompe sikhaani soolopwana ni amwaanyompe." Munnona?

Nto miyo khwira, "Munttoittoini nle naamukhaani?"

Owo khwira, "Ayo."

⁵² Miyo khwira, "Alakela nto mw'ekhasani yothene yaamukhala emilyawu ntero ya yaawo?"

Owo khwira, "Oh, ayo." Munnona? Vano, nwehe oratteene.

⁵³ Vano, vaairaneyaka etthu ila yuulupale, nookhala nooce nimosa ninwehererya eropo emosa ya emilyawu yeeyo. Ni khaavo onwerya ohimya eropo xeeni, wala nooce xeeni. Mwaweharu oyariwa w'ephattu, t'okhalanxe mwiiriirya ovikana o—oyariwa w'eharusi. Okhala wira, mw'ekhasani, ori mmosa mme otthomeliwe okhala, nto akina aya animookhwa. Nto kahi ole onipacerya ophwanya; t'ule onipacerya ophitaana ni nooce. Khino nooce pooti orwa ottuli w'ekhasa, wala eriyari y'ekhasa; eropo pooti wira siiso, nooce. Eropo enoopuruleya ekelaka muhina mwa nooce, miila sikhaani sinoomora-vo, nto vo onipacerya muthana. Ori mmosa paahi ekapatti yothene, ya emilyawu, onrowa owerya, mmosa paahi; ni eyo enilamuleliwa ni Ekuru yoohisuweliwa, wa mutthu. Nnakhala vo nyuwo mwa, khula mmosa, munoolikana, khula emosa wa iropo iye sinoolikana. Etthu emosaru mw'axinama. Etthu emosaru mwa mutthu. Yoolamuleliwa sinto onrowa okhala mwaana mulopwana, muthiyana, ooxeerya maihi, ooriipa maihi, wala etthu ekina. Enilamuleliwa ni Muluku. Sothene saya sinoolattana, v'ephattu, masi ori mmosa mme otthomeliwe ekumi; mmosa muhina mwa emilyawu emosa, nnakhala vo othene aya oolattana.

54 Okathi Isarayeli okhumaly'awe wEjitu, yaahikhala atthu oohalelaka ophiya imilyawu piili yaakhumme okathi mmosaru. Khula mmosa aahiiwa mutthaka wa profeta. Khula mmosa aahoona Nlumi na Mooro. Khula mmosa aahipatisiwa mwa Moise, Ophareya Yooxeerya. Khula mmosa aahikhuwela mwa e—Eroho, aahoopa ikoma aahitthimaka nno ni nno mukerekhere mwa ephareya, ni Miriyamu, okathi Moise iipaly'awe mwa Eroho. Awo, khula mmosa, aahiwurya vaMwala mmosaru wa erooho. Awo, khula mmosa, aahilya Emanu ohiyu wothene. Khula mmosa a yaawo! Masi yaari aili yaaphiyale mmuttettheni, mmosa mwa emilyawu emosa.

55 Weereriwa waari exeeni? Awo othene yaawurya vaMwala mmosaru, awo othene yaahilya Emanu emosaru ya muroohoni ntoko hiyo ninly'ahu voosiis'ula, masi wehererya wa Masu waahiwooniherya. Vaphiyaly'aya okathi wa oKadexi-barne, okathi aronwaaya okela muttethe wa natiri, ni khiyaawenrye okela mpakha weereriwa ni Masu. Ni othene a—akina muloko khutthika khwira, “Khaninrowa owerya! Atthu ari ntoko. . . Hiyo ninkhala ntoko isoope, w'awo, muttethe aya muulupale wootekeleliwa ixiri. Owanani khureere wunnuwa.”

56 Masi Yoxuwa ni Kalebi khwaamaaliha atthu. Awo khwirasa, “Hiyo nootepa oweryexa!” Mwaha wa xeeni? Muluku aahihimya, awo ehinatthi okhuma, muttethe wa natiri, “Miyo kihoovahani muttethe owo. Miyo kihoovahani. Ti wawinyu.” Masi aari mmosa muhina mwa khula emilyawu.

57 Aakhala atthu oohalelaka ophiya imilyawu imiya thanu aniihaniwa aKristu mulaponi olelo, ni khula nihiku ninnimala nloko. Nto vano, ankhii vaakhanle wira Okuxiwa waamoorwa olelo ni atthu imiya thanu, mulaponi mothene, khuroihiwa Mookuxiwani? Khivaarowa osuweliwa mnakhala wooniwa muxornaaleni, wira awo aarowa. Ni Orwa w'Apwiya Orwa w'esiiri. Awo anrowa orwa ni okhuma ni mwiitiho. Anrowa okhala atthu vakhaanixa, mpakha. . .

58 Siiso ntoko saary'aya mahiku awiixutti yaamukohaly'aya Yesu, “Khi Awiixuttithi a ikano ohimyaka wira—wira Eliya ohaana opacerya orwa?”

Owo khwira, “Owo ohoorwa, nto nyuwo kuhisuwela.”

59 Nyuwo mwaahitoko wuupuwela etthu atthu yiiraly'aya? Awo yaahitthikela yaaminiki wira Mala- . . . wira Mala- . . . Eliya aamoorwa. Nto owo aari eriyari aya, vano awo khayaasuwela.

60 Siiso-tho enookhala orwa wa Mwaana a mutthu! Awo anoomwiiriha Owo etthu emosaru. Eroho ya Muluku eri vaava. Ahe, ninrowa wiiriha-ni Yeeyo? Ninrowa olya Emanu, ni siiso, ni ohitthikela nikelalaka ohoolo okathi oninnuw'ahu?

61 Mootoko owaha epyo, ntoko Reverendu Pitts saahimy'awe okathi vakhani ovinre, ni moota epyo enimorel'aya mutthayani? Ipyo sinci-ene siri memme mutthayani. Okathi Muluku

eetteetaly'awe vasulu va maasi, ni Waarya, nto Waarya khwiimiha, Mukhalelo woopacerya wa Muluku, Waarya waahimmwe waakhumelenle ni Masu a Muluku. Ni Masu a Muluku etthu emosa paahi nlelo eniruuha Waarya. Nto maasi vatthikenly'aya ottuli, epyo yaahimala okhala vatthayani, ni Waarya waakumihenrye paahi ipyo saakhala ni eropo mwa seiyo, saahiphuwa. Muluku apakaka opattuxa Wawe.

⁶² Nto vano, voosiisu wa Pasikha waahikhala Waarya mukina waamwalenle elapo ya vathi, okathi Eroho Yowarya evaheriwaaya. Ni Eyo evaheriwe wira eruuhela Waarya Ipyo iye Muluku, mwa osuwela Wawe khalayi ene, aasunwenly'awe wira saamukhala va elapo ya vathi. Ntoko Owo aasuwenly'awe epyo y'ephattu yoopacerya, Owo onnisuwela nipuro vari Epyo ya erooho. Erutthu anyu yaaphwanyaneya vaava va elapo ya vathi, okathi Muluku opattuxaly'awe elapo woopaceryani. Hiyo na epantte ya etthaya. Hiyo naaphwanyaneya vaavo. Nto mwaha wo osuwela Wawe khalayi ene Owo aahisuwela vekeekhai t'ani aarowa omphenta Yoowo ni t'ani aarowa omurumeela Yoowo, ni t'ani ahaarowa. Osuwela Wawe khalayi ene onnihimya yeeyo. Vaahikhale siiso, wesoo Owo kahi Muluku. Owo khokhanle okhalaka Muluku ahikhanle oohimala. Ni vakhala wira Owo t'ohimala, Owo onnisuwela itthu sothene.

⁶³ Vano, munoowoona atthu yiiraka soovonya saya. Awo animwiikwattula mwa yeeyo. Awo anootuphela eyo, ni wuupuwela *ela* ni *ele*, masi khenivar'etthu, hiyo ninnoona. Masi yookhala etthu envara muteko, ekhanle ophwanya othuna wooloka wa Muluku n'ukhala mwa yoowo, etthu Muluku owiihanenly'aweni.

⁶⁴ Ntoko Munna Jack sihimaly'awe okathi vakhani ovinre mwaha wa nno ni—Nipuro Persiani, evitikavitika yothene. Mmosa enamuna *ela*, ni mmosa enamuna *ele*; ni mwaha wa mateyooloku, ni sikina, wira nyuwo mwatthuna omusuwela teyoloxiia vakhani, muroweke weiwo.

⁶⁵ Kinoona wira vekeekhai eri ntoko oParki Hyde oLontres. Miyo kaari weiwo, atthu othene arina muupuwelo aya mmansaya. Iwo o—othukumaniwa wa olumwenku wa vano oPapilooniya.

⁶⁶ Masi mooweha moota—moota Munna Pitts aakelenly'awe ohoolo ni mutthaka awe wooreera voosiis'ula wa hiyo? Okathi orowaly'awe okhuma oparki, iwe owo aahiphwanya ekhokowa yaamukhaani ya Pasikha. “Variyari v'evitikavitika yothene,” ntoko siniruuhenly'awe, “eyo khayaarina enamuna yo wira 'ayo' wala 'nnari.' Yaari ekumi ya Muluku yaaryaka mwa yeeyo, varyari v'evitikavitika yothene.” Yaari vaavale mookaryani mwaya, okhala wira Muluku aahitthomela wira ekhale vaavale. Variyari v'ekhotto yothene, khaavo aaweha. Awo khayoonale olikanyiha wa muroohoni ya yeeyo.

67 Nto ti siiso olelo varyari va mithukumano sahu sothene suulupale ni makhuru, ni ikereja ni miromolelo, ni sikina. Mmosa ompurulela epantt'ila nno, "Hiyo nihaana okhala aPatista, wala okhala maPrespiteriyaano, nihaana okhala *ela, ele, wala ekina.*" Varyari va yothene eyo, nookhala nluwa nininnuwa. Wookhala owerya wa Muluku eriyari ahu yoochi, onivenxiwa eriyari ya hiyo othene. Nrowe neemele paahi niwehe yeeyo, minuutu vakhani, ni niwehe esumana yeela, ni noone othapuluwaka ohoolo wahu. Hiyo ninnaamini wira Muluku onimwiira. Khamunaamini? [Muthukumano oniira, "Amen."—Mol.]

68 Kinnoona wira naahaana okhala epantte ya vathi vano. Vano nrowe nivekele, khula mmosa a hiyo.

69 Muluku Oophenteya, nuuramihaka muru ahu Ohoolo Wanyu, ninnoona wira khanireere okhala oohiphiyerya wira niveke. Masi Nyuwo moonilaiherya wira, hiyo narwaaru, Nyuwo khamwaarowa onithanya. Ni moolumo ala oolipa amanle ohimmwa, kahi wira ekhale mwiixuttiho nnakhala vakhani, "mmosa varyari va emilyawu emosa," masi wira nuupuwele paahi. Maana Nyuwo moohimya:

*...mukhora ti woophunyeyya, ni ephiro ti yoorika,
enroiha mw'ekumini, vano ale amphwanyaya eyo ari
vakhani.*

*Okhala wira oowiihaniwa ari anci-ene, masi
oothanliwa ari vakhani.*

70 O Tithi Oohimala, nveleelihe Waarya wa Ehapari yooreera mmuttettheni mu, mwa esumana ela enrwa ya mithukumano. Nto yaakhanleene Epyo, mwa enamuna emosa ni eyeettiheryo Anyu Yeenyu yuulupale, ni woosuwela, ntoko siphavenly'aka wooniherya mw'ekhasani y'olopwana ni oothiyana, iyo sirwe omithukumanoni. Eroho Yowarya yaavahe Waarya. Hiyo ninnisuwela wira okathi khino ohooxa ovikana sinuupuwel'ahu. Hiyo ninnivekela, Muluku, wira ntoko siruuly'ahu va, naamniki paahi wira khino yookhala etthu va enweryaneyya wiiriwa wira yaakhaliherye atthu, wala—wala wira ephwanye epwittipwitthi ile yookiserya. Hiyo noosuwela, wira nikhoma nasarya vale, nto Makampusi onoowala mukhora.

71 Ntoko saary'aya mahiku a Nowe, okathi mutthu ookiserya a mw'emusini aavoloihiw'awe, Muluku aahiwala mukhora. Nto awo yaahimana yaahikutula, masi waahixa-vo. Muluku Oophenteya, awo yaahikhalana okathi.

Nyuwo moohimya wira, "Miyoo ka Mukhora yoowo wa munikhomani."

72 Nto mootaa esipo ya poweeta ery'aya yooreerexa, "Miloko mithanu na mixexe ni thanu na xexe khasiniphiyerya wa Nyuwo? Masi, nnari, yaahikhala-tho emosa." Siiso ekhanleene epwittipwitthi yaamukhaani yooriipa, wala eyo pooti okhala

mwaamukhaani oohikhal'etthu, pooti okhala mwaamukhaani muthiyana wala mulopwana. Hiyo khanisuwenle ory'aya-wo, masi ele yookiserya ehaana ovolowa vano mukhora onoowaliwa. O Muluku, Ole onsuwela itthu sothene, mutokose ikumi sahu voosiis'ula. Ni munirume khula nipuro nikhanly'ahu orowaka, wira niphwanye ele yookiserya, wira mukhora owaliwe ni Makampusi mpaani ni ipwittipwitthi. Munivahe, Pwiya. Eyo yakhala vaava olelo, vakhala wira eyo ehaana ovolowa . . .

⁷³ “Othene ale Atithi akivahaly'aya animoorwa wa Miyo. Ni khaavo onwerya orwa, vahikhanle wira Atithi Aka anoomuruuha.”

⁷⁴ Ni yakhala ekwanyeryo, wala moonelo mwaamukhaani, wira ola p'ukathi wa mutthu va muthukumano yoola, va wala vathi, wala khula nipuro awo ary'aya, yaakhule, “Ayo, Pwiya, Miyo ka yeeyo ekhaani yooweettasa eneettasaka; ni enikhootaka Yeeyo, okhala waka wothene. Miyo—miyo—miyo kihoona wira kaahaana orwa, masi olelo kimpwanyaneya epantte yooxinttiwa. Nkinwerya owela wala okhuruwa. Nkinwerya orowa hata epantte emosa.” Oh, Makampusi muulupale arwe, ookole matata oosivela ni aruue epwittipwitthi iyo voolipa-vo, ohele vasulu va makhata Awe ni ahokoloxe voolipa-vo.

⁷⁵ Khino yookhala emosa va, Pwiya, enwereiwa, mwa mukhalelo woolikana, meetiku ohimaly'awe wira, “Khiivo etthu ekhanle wiiriwaka.” Owo ohiilipiha wira oopole, masi khowenrye woopola. Yoovikana ele enwerya'awe. Khiivo—khiivo etthu owo onwery'awe wira. Murette awe wala mwaalo awe khasinwerya ophiyerya yeeyo. Masi, O Pwiya, khiivo etthu ekhalanxe ottaiwene wa moonoo Anyu muulupale, ni Masu Anyu ti moonoo Anyu. Vano hiyo ninnivekela, Muluku Oophenteya, wira, voosiis'ula, nilavulaka ni Nyuwo, wira Nyuwo mookole ntata muttotte eyo enwereiwa ni ehinwerya wiikhaliherya mmansaya, sihiniphiy'aya myaha sothene sa siyensiya, ottaiwene wa meetiku, evonihwiwe. Munivahe, Pwiya.

⁷⁶ Nimuupuwelaka Davidi, ntoko saavahiwaawe muteko wira asukeke ipwittipwitthi kamosa-kamosa, vakhani paahi. Masi nihiku nimosa ekhaya yaahirwa khuvara epwittipwitthi iyo yaamukhaani khukuxa, ni yaamwiira ekhuuraleene (ntoko kankuru aarowaawe okhura erutthu), wala kharamu muulupale. Masi Davidi, oohikhalanexa ikaruma saana ni ka—kapwitthi, wala, naxoowa, masi ni pharancikula paahi, owo aahithimakela epwittipwitthi iyo. Nto vamuphwanyaly'awe mwa—mwaamunama owo aahalela wiiva epwittipwitthi iyo yaamukhaani, owo aahimwiiva ni pharancikula. Kapwitthi mwaamukhaani paahi ookhweya aarina ekattakha ni mukhoyi, ni, masi owo aahikhalana nrromelo ni yoowo.

⁷⁷ Hiyo khanirina atthu oosuwelexa vaalupale eriyari ahu, Pwiya. Hiyo n'atthu oowiiyeviha ni nivekelo naamukhaani, masi hiyo ninoorwa voosiis'ula ottuli wa ipwittipwitthi s'Atithi. Muthiyan'ole oneettasaka muramphani, vootakhaliwa, aavuraka asikaro, aphaavelaka ophwanya murettele ni sikaro; mulopwan'ole oonale wunkha ekoopho khuphavela osusiha, masi nwanani onoomuvarelela saana; mmirav'ole wala mwali omphavela wira sooreera, ohinwerya ophwanya ikuru wira ataphuwe mwa yoonanara; hiyo ninoorwa mu Nsina na Pwiya Yesu, wira niveke ottikiheriwa epwittipwitthi iyo voosiis'ula. Hiyo ninniwanana nwanani; okhala wira etthu yookhweya, pharancikula, nivekelo, masi hiyo ninoorwa wira nittikiherye epwittipwitthi iyo munikotoni mw'Atithi, wira naakhulele muteko wa itthu iye nivaheriw'ahu mmatatani mwahu. Owerya wa Muluku vano okumiherye waamini, mmurimani mw'atthu, ni wira mutthu ule orimenle ahokolowe vooviiis'ula. Soottehatteha sa makhalelo ala simuhiye, simuhiye arowe. Ni wira owo aiphwanye oolipa mmakhatani mwa Mwiiixuttihi, akuxiwaka ahokoloxeriwaka voolipa-tho. Hiyo ninvekela mwa Nsina na Yesu. Amen.

⁷⁸ Muluku ooreeriheni nyuwo othene. Mpakha meelo, kinrowa onvahererya muteko Munna Shakarian. [Nipuro vahiitthu mufiitani—Mol.]

[Munna Branham onimaliha epantte ya neeraru—Mol.]

☆☆☆☆☆☆

⁷⁹ Ela, ki—kinroromela wira munoo...wira koophwanyaxa mahala vamaithoni va Muluku ni ohoolo wanyu, wira muhaamini wira kaamweemela va wooleelani etthu yoovonyeya. Kooviriha iyaakha saka miloko mithanu ni thanu na mosa, nihiku nle. Ola kuhiyo Mutthaka wa mulopwana mutokweene paahi. Kinaamini yoola okhuma kiry'ene mwammiravo. Nto ela yaahikhale ekeekhai, miyo ka mutthu ootepexa ovahuwa Muluku otonko awe okhalana elapo ya vathi. Miyo koovahererya ekumi aka yothene mwaha wa Niwoko nenla. Ni mukihye kihimye ela n'ixariya: vaakhanle wira kaahikhalana ikumi ikonto muloko, nkaakhalakhala kirukunuwaka muupuwelo aka.

⁸⁰ Vano, ovonihwa onniphwanyeya wa khula mutthu. Muupuwele, ovonihwa ori mwa nyuwo. Muluku ohela mmwirini wa peeseku khula epeeseku yaarowa okhalakhala ekhalaka mwa yoowo, okathi Owo ophatteyaly'awe Mmatta. Moone, nyuwo paahi...mwiri wa peeseku wala mwiri wa masa, wala mwiri wa mihokorokho, ohaana wunnuwa paahi, waawuryaka maasi a vathi. Vano khula mmosa a nyuwo ookhalana ikuru seiyo mwa nyuwo, wira soovuluxeni, okhala wira Mulukuu, okhala wira mophatteiwa mwa Kristu ni opatiiso (kahi opatiiso wa maasi), opatiiso wa erooho. Nyuwo

khamunkela mwa Kristu ni opatiiso wa maasi. Ni opatiiso wa erooho!

⁸¹ Meelo oxekuwa, Apwiya yatthuna vale, kinrowa olavula yeeyo, *moota xeeni* ni *xeeni* ekhanle elikanyiheryo y'ekeekhai ya Yeeyo. Nikhalihale oxekuwa wira ehikutakuthe hata mmosa wa miteko sanyu s'okokhorela.

⁸² Vano nkawehani, khula mmosa a nyuwo va omphwanyaneya va ntoko mulipa-oowaamini, moone, vano Ekumi yaari mwa Kristu eri mwa nyuwo. Eyo enniwerya, vaakhanle wira mwaamuwerya woona yeela!

⁸³ Ti muteko wa xetwani wookhalihani oohiwerya ophiyerya Yeeyo, wookhalihani oohoona. Owo onoowerya wookhalihani oohoona paahi, ahiiso, moone, khamunrowa osuwela onrowaanyu nto. Mutthu ohinoona khonwerya ohimya onrowaawe, owo ohaana ophavela osuwela wa mutthu onwerya woona. Mpakha hiyo osuwela saana, mutthu ohaana onileela ele ekhanle Ekeekhai.

⁸⁴ Nto Kristu ookhwenleni nyuwo, ni nyuwo moopheliwa molumwenkuni khuphatteiwa mwa Kristu. Nto sothene mumphavel'anyu siri mwa nyuwo, ni opatiiso wa Eroho Yowarya. Kahi siiso? Vano etthu emosa paahi murin'anyu wira opacerya owurya paahi mwa Yeeyo.

⁸⁵ Nto okathi mwiri onwury'aya, onoopacerya okumiherya mathaakhuru aya, niphuwa naya, onniima muhokorokho aya khula eyaakha. Muhokorokho khokhanle vathi; muhokorokho ori mmwirini. Akavi ansuwela yeeyo, mwiire "amen." [Muthukumano oniira, "Amen."—Mol.] Vano, moone, muhokorokho ori mmwirini, ni khula mwiri ohaana owurya veephattuweloni vaya va maasi. Okathi epula enoorw'aya, ennivaha mwiri uwo, ekumi, wira owuryeke vaavo. Ni, owo waawuryaka, onninuwa.

⁸⁶ Ni onninuwa mpakha ophiyerya niphuwa noomalela, voolikana ntoko Ekereja, wira yaaleye ithutu okathi ula.

⁸⁷ Nto, okathi oniwury'ahu, hiyo ninimunuwa. Masi mwiri wakhootta owurya, vano mwiri khokhanle wunnuwaka. Nto nyuwo mwaaminiru paahi vano, khula mmosa!

⁸⁸ Vekeekhai, nyuwo munnisuwela moota Apwiya aniiir'aya, annooniherya itthu soohiyana-hiyana, wa itthu siiraly'anyu ni itthu sahaatthuneya wira, ni sikina, vamuthukumanoni. Hiyo naaniwehererya wira Eroho Yowarya yaamunikhuruwela voosiis'ula ni wira siiso, neemelaka. Masi kaahikhala kilipelelaka.

⁸⁹ Kinoona wira eyo t'epantte yoowuukhuwiha, wuupuwela wira nipuro na vathi awo antthuna wira nikhume va, moone. Masi awo annitthuna hiyo; hiyo nooxeleliwa vano.

⁹⁰ Masi mwaamini ila, ni murima wothene. Xontte mwaamini. Vakhala wira miyo—miyo koophwanya mahala vamaithoni vanyu, ntoko mutthu a exariya, mwaamini ila. Vano mwiixatheeryane matata m—mmosa ni mukhw'awe.

⁹¹ Vano nwehe, vano, Bibilia khohimmye wira, “Ithoonyeryo iya sinoomutthara William Branham.” Khohimmye wira “Sinoomutthara Oral Roberts paahi.” Khohimmye wira saarowa omutthara “Munna Kopp” wala “mutthu siiso.”

⁹² “Ithoonyeryo iya sinimwaatthara ale,” oowaatta, “anrowa waamini. Awo yawiixaatherya matata aretta, awo anoopenuwa.” Ti owerya weiwo wa Muluku ori mwa nyuwo, onimuruuhela Ekumi mutthu mmupwehenry'anyu ntata, ephattuvelo enivaha Ekumi ya Eroho Yowarya.

⁹³ Muluku Oophenteya, mu Nsina na Yesu Kristu, okathi ula woomaliherya okathi ekereja... ephwanyaneye okathi ula, ehikhanle oowuukhuwa, ni Owerya omuhihimunxe Kristu mmahiyeni, ovahe ekumi wa yaawo naanaano Ekeekhai ya Ehapari yooreera, wira oniruma wa Yesu waari, awo “yawixatherya matata aretta, awo anoopenuwa.” Khula ekuru ya xetwani, khula ekwerere, khula eretta, khula muxankiho, khula etthu enihooxa yaakhumelenle atthu, ekhume naanaano va ni waamini. Ntoko atthu oowaamini, hiyo ninvekela mu Nsina na Yesu Kristu. Amen.

⁹⁴ Vano nvenxe matata mmuttotopele Yoowo, vakhala wira munnaamini wira Owo onniira yeeyo.

⁹⁵ Muluku Oophenteya, mwaan'ola onimookhwa, Pwiya, voohikhala wira enimwiiriwa. Miyo kinnipwapwela ephutu ila, mu Nsina na Yesu Kristu. Emuhiye mwaan'ola oohittheka. Amen.

Vano, mameetiku yaahehererya, khuvonya. Mwaamini paahi.



MMOSA VARIYARI V'EMILYAWU EMOSA EMK65-0424
(One In A Million)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu vaasiisu, mahiku yeetaka 24 mweeri w'Abiril, 1965, woolyani wa voosiisu wa Opatthana wa Mulaponi mothene w'Alipa a Nakoso a Ehapari yooreera Yoomalela oRestaurante Clifton oLos Angeles, California, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org